

摘藻堂四庫全書薈要

集部

欽定四庫全書薈要

集部

東坡全集卷十九

二十

詳校官助教臣常循



欽定四庫全書薈要卷一萬四千八百五十一


集部

東坡全集卷十九

宋 蘇軾 撰

詩六十四首

次韻劉景文西湖席上


老長身屹兩峰常撞大呂應黃鍾將辭鄴下劉公幹
却見雲間陸士龍白髮憐君略相似青山許我定相從
吾今官已六百石慙愧當年邴曼容

次前韻答馬忠玉

坡陀巨麓起連峰積累當年慶自鍾靈運子孫俱得鳳
慈明兄弟孰非龍河梁會作看雲別詩社何妨載酒從
祇有西湖似西子故應宛轉為君容

予去杭十六年而復來留二年而去平生自覺
出處老少粗似樂天雖才名相遠而安分寡
求亦庶幾焉三月六日來別南北山諸道人
而下天竺惠淨師以醜石贈行作三絕句

當年衫鬢兩青青強說重臨慰別情衰髮祇今無可白

故應相對話來生

出處依稀似樂天
敢將衰朽較前賢
便從洛社休官去
猶有閒居二十年

在郡依前六百日
山中不記幾回來
還將天竺一峯去
欲把雲根到處栽

次韻答黃安中兼簡林子中

老去心灰不復然
一麾江海意方堅
那堪黃散付子度
空羨杭蘇養樂天
病肺一春難白酒
別腸三夜繞朱絃

羣仙政欲吾歸去共把清風借玉川

留別蹇道士拱辰

黑月在濁水何曾不清明寸田滿荆棘梨棗無從生何
時反吾真歲月今崢嶸屢接方外士早知俗緣輕庚桑
託雞鵠未肯化南榮晚識此道師似有宿世情笑指北
山雲訶我不歸耕仙人漢陰馬微服方地行咫尺不往
見煩子通姓名願持空手去獨控橫江鯨

次韻子由書王晉卿畫山水二首

老去君空見畫夢中我亦曾遊桃花縱落誰見水到人間伏流

山人昔與雲俱出俗駕今隨水不回賴我胸中有佳處
一樽時對畫圖開

又書王晉卿畫四首

山陰陳迹

當年不識此清真強把先生擬李倫等是人間一陳迹
聚蚊金谷本何人

雪谿乘興

谿山雪月兩佳哉
賓主談鋒夜轉雷
猶言不見戴安道
為問適從何處來

四明狂客

毫端偶集一微塵
何處谿山非此身
狂客思歸便歸去
更求教賜在天真

西塞風雨

斜風細雨到來時
我本無家何處歸
仰看雲天真箇笠

旋收江海入簑衣

破琴詩并引

舊說房瑄開元中嘗宰盧氏與道士邢和璞出游過夏
口村入廢佛寺坐古松下和璞使人鑿地得壑中所藏
婁師德與永禪師書笑謂瑄曰頗憶此耶瑄因悵然悟
前生之為永師也故人柳子玉寶此畫云是唐本宋復
古所臨者元祐六年三月十九日予自杭州還朝宿吳
松江夢長老仲殊挾琴過予彈之有異聲就視琴頗損

而有十三絃予方歎惜不已殊曰雖損尚可修曰奈十三絃何殊不答誦詩云度數形名本偶然破琴今有十三絃此生若遇邢和璞方信秦箏是響泉予夢中了然識其所謂既覺而忘之明日晝寢復夢殊來理前語再誦其詩方驚覺而殊適至意其非夢也問之殊蓋不知是歲六月見子玉之子子文于京師求得其畫乃作詩并書所夢其上子玉名瑾善作詩及行草書復古名迪畫山水草木益妙絕一時仲殊本書生棄家學佛通脫

無所著皆奇士也

破琴雖未修中有琴意足誰云十三絃音節如佩玉新
琴空高張絲聲不附木宛然七絃箏動與世好逐陋矣
房次律因循墮流俗懸知董庭蘭不識無絃曲

題王晉卿畫後

醜石半蹲山下虎長松倒卧水中龍試君眼力看多少
數到雲峯第幾重

聽武道士彈賀若

清風終日自開簾涼月今宵肯挂簷琴裏若能知賀若
詩中定合愛陶潛

元祐六年六月自杭州召還汶公館我於東堂
閱舊詩卷次諸公韻三首

半熟黃梁日未斜玉堂陰合手栽花却尋三十年前味
未飯鐘聲已飯茶

夢覺還驚屨響廊故人來炷影前香鬢鬚白盡成何事

一帖空存老遂良

法帖中有褚遂良書云
即日遂良鬚髮盡白

尺一東來喚我歸，衰年已迫故山期。
文章曹植今堪笑，却卷波瀾入小詩。

次韻子由書王晉卿畫山水一首而晉卿和二

首

誤點故教同子敬，雜篇真欲擬湯休。
攏雲寄我山中信，雪月追君溪上舟。
會看飛仙虎頭篋，却來顛倒拾遺裘。

子美詩云天吳與紫鳳，顛倒在短褐。

王孫辨作玄真子，細雨斜風不濕鷗。

此境眼前聊妄想，幾人林下是真休。
我今心似一潭月。

君已身如萬斛舟看畫題詩雙鶴鬚歸田送老一羊裘
明年兼與士龍去萬頃蒼波沒兩鷗

感舊詩并引

嘉祐中予與子由同舉制策寓居懷遠驛時年二十六
而子由二十三耳一日秋風起雨作中夜儵然始有感
槩離合之意自爾宦遊四方不相見者十常七八每夏
秋之交風雨作木落草衰輒悽然有此感蓋三十年矣
元豐中謫居黃岡而子由亦貶筠州嘗作詩以記其事

元祐六年予自杭州召還寓居子由東府數月復出領
汝陰時予年五十六矣乃作詩留別子由而去

床頭枕馳道雙闕夜未央車轂鳴枕中客夢安得長
新秋入梧葉風雨驚洞房獨行慚月影悵焉感初涼
筮仕記懷遠謫居念黃岡一往三十年此懷未始忘扣門呼

阿同

子由一
字同叔

安寢已太康青山映華髮歸計三月糧我

欲自汝陰徑上潼江章想見冰槃中石密與柿霜

子欲
請東

川而歸二物
皆東川所出

憐子遇明主憂患已再嘗報國何時畢我

心久已降

西湖秋涸東池魚窘甚因會容呼網師遷之西
池為一笑之樂夜歸被酒不能寐戲作放魚

一首

東池浮萍半粘塊裂碧跳青出魚背西池秋水尚涵空
舞濶搖深吹荇帶吾僚有意為遷居老守縱饒那忍膾
縱橫爭看銀刀出澆滸初驚玉花碎但愁數畧損鱗鬣
未信長堤隔濤瀨澌澌發發須臾間圉圉洋洋尋丈外

安知中無蛟龍種尚恐或有風雲會明年春水漲西湖
好去相忘渺淮海

復次放魚前韻答趙承議陳教授

擾擾萬生同大塊捨榆不羨培風背青丘已吞雲夢芥
黃河復繚天門帶長譏韓子隘且陋一飽鯨魚何足膾
東坡也是可憐人披抉泥沙收細碎迺將歸休八節灘
又欲往釣七里瀨正似此魚逃網中未與造物遊數外
且將新句調二子湖上秋高風月會為君更喚木腸兒

脚扣兩舷歌小海

九月十五日觀月聽琴西湖一首示坐客

白露下衆草碧空卷微雲孤光為誰來似為我與君水
天浮四坐河漢落酒樽使我冰雪腸不受麴蘖醺尚恨
琴有絃出魚亂湖紋哀彈本舊曲妙耳非昔聞良時失
俯仰此見寧朝昏懸知一生中道眼無由渾

復次前韻謝趙景貺陳履常見和兼簡歐陽叔

弼兄弟

能詩李長吉識字揚子雲端能居此府坐歛獲兩君逝
將江湖去浮我五石樽春馬復少留尚為世所醺或勸
莫作詩兒輩工織紋朱絃寄三歎未害俗耳聞共尋兩
歐陽伐薪照黃昏是家有甘井汲多終不渾

送歐陽主簿赴官韋城四首

鳳雛驥子曰相高白髮蒼顏笑我曹讀遍牙籤三萬軸
却來小邑試牛刀

出處年來恨不齊一樽臨水記分攜江湖咫尺吾將老

汝潁東流子却西

白馬津頭春水來白魚猶喜似江淮使君已復永堂酒
更勸重新畫舫齋

道傍垂白定沾巾正似當年綠髮新故國依然喬木在
典刑復見老成人

泛潁

我性喜臨水得潁意甚奇到官十日來九日河之湄吏
民笑相語使君老而癡使君實不癡流水有令姿遶郡

十餘里不駛亦不遲上流直而清下流曲而漪畫船俯
明鏡笑問汝為誰忽然生鱗甲亂我鬚與眉散為百東
坡頃刻復在茲此豈水薄相與我相娛嬉聲色與臭味
顛倒眩小兒等是兒戲物水中少磷緇趙陳兩歐陽同
參天人師觀妙各有得共賦泛潁詩

六觀堂老人草書詩

物生有象象乃滋夢幻無根成斯須方其夢時了非無
泡影一失俯仰殊清露未晞電已徂此滅滅盡乃真吾

云如死灰實不枯逢場作戲三昧俱化身為醫忘其軀
草書非學聊自娛落筆已喚周越奴蒼鼠奮鬚飲松腴
剡藤玉板開雪膚遊龍天飛萬人呼莫作羞溢羊氏姝
六觀取金剛經夢幻等六物也老人僧了性精於
醫而善草書下筆有遠韻而人莫知貴故作此詩

次韻劉景文見寄

淮上東來雙鯉魚巧將書信渡江湖細看落墨皆松瘦
想見掀髯正鶴孤烈士家風安用此書生習氣未能無
莫因老驥思千里醉後哀歌缺唾壺

次韻趙景貺督兩歐陽詩破陳酒戒

商也哀未散歲月忽已秋
祥琴雖未調餘悲不敢留
矧此乃韻語未入金石流
羲之生五之總角出銀鈎
吾家有二許下筆兩不休
君言不能詩此語人信不
千鍾斯為堯百榼斯為丘
陋矣陶士行當以大白浮
酒中那有失醉則不驚鷗
明當罰二子已洗兩玉舟

叔弼云履常不飲故不作詩
勸履常飲

我本畏酒人臨觴未嘗訐
平生坐詩窮得句忍不吐吐

酒茹好詩肝胃生滓汙用此較得喪天豈不足付吾儕
非二物歲月誰與度悄焉得長愁為計已大誤二歐非
無詩恨子不飲故強為醕一酌將非作愁具成言如皎
日援筆當自賦他年五君詠山王一時數

臂痛謁告作三絕句示四君子

公退清閒如致仕酒餘歡適似還鄉不妨更有安心病
卧看縈簾一炷香

心有何求遣病安年來古井不生瀾祇愁戲瓦間童子

却作泠泠一水看

小閣低窓卧晏溫
了然非默亦非言
維摩示病吾真病
誰識東坡不二門

到穎未幾公帑已竭齋厨索然戲作數句

我昔在東武吏方謹
新書齋空不知春
客至先愁予采
杞聊自誑食菊
不敢餘歲月今幾
何齒髮日向踈
幸此一郡老依然
十年初夢飲本
來空真飽竟亦
虛尚有赤脚婢
能烹鱸尾魚
心知皆夢耳
慎勿歌歸歟

景貺履常屢有詩督叔弼季默唱和已許諾矣
復以此句挑之

君家文律冠西京旋築詩壇按酒兵袖手莫輕真將種
致師須得老門生明朝鄭伯降誰受昨夜條侯壁已驚
從此醉翁天下樂還應一舉百觴傾

文忠公贈蘇梅詩
云我亦願助勇鼓

旗譯其旁快哉天
下樂一醜宜百觴

贈月長老

天形倚一笠地水轉兩輪五霸之所運毫端栖一塵功

名半幅紙兒女浪苦辛子有折足鐺中容五合陳十年
此中過却是英特人延我地爐坐語軟意甚真白灰如
積雪中有紅麒麟勿觸紅麒麟作灰維那瞋拱手但默
坐墻壁方諄諄今宵恨客多汗子白氎巾後夜當獨來
不煩主與賓蒲團坐紙帳自要觀我身

次韻答錢穆父以軾得汝陰用杭越唱酌韻作
詩見寄

大耿疲勞已離羣小馮慈愛且當門

軾本以舍弟親孃請郡

玉堂

不著扶犁手霜鬢偏宜畫鹿轡豪傑雖無兩王繼

子直深父

風流猶有二歐存

叔弼季默

清詩已入新歌舞要使邦人識

雅言

韓退之益郊墓銘云以昌其詩舉此問王定國

當昌其身耶昌其詩也來詩下語未契作此

答之

昌身如飽腹飽盡還當饑昌詩如膏面為人作容姿不如昌其氣鬱鬱老不衰雖云老不衰劫壞安所之不如

昌其志志一氣自隨養之塞天地孟軻不吾欺人言魏
勃勇股栗向小兒何如魯連子談笑却秦師慎勿怨謗
讒乃我得道資淤泥生蓮華糞壤出茵芝賴此善知識
使我枯生萋吾言豈須多冷暖子自知

送歐陽推官赴華州監酒

我觀文忠公四子皆超越仲也珠徑寸照夜光如月好
詩真脫兔下筆先落鶻知音如周郎議論亦英發文章
乃餘事學道探玄窟死為長白主名字書絳闕

熙寧之末仲純

父見僕於京城之東曰吾夢道士持告身授吾曰傷心上帝命汝為長白山主此何祥也明年仲純父沒清潁尾已伴白鷗沒喜見三少年俱有千里骨千里不難到莫遣厯塊蹶臨分出苦語願子書之笏

十月十四日以病在告獨酌

翠柏不知秋空庭失搖落幽人得佳蔭露坐方獨酌月華稍溢穆霧氣尤清薄小兒亦何知相語翁正樂銅爐燒柏子石鼎煮山藥一盃賞月露萬象紛疇酢此生獨何幸風纜欣初泊逝逃顏蹠網行赴松喬約莫嫌風有

待漫欲戲寥廓冷然心境空
髣髴來笙鶴

獨酌試藥玉滑殘有懷諸君子
明日望夜月庭
佳景不可失作詩招之

鎔鉛煑白石作玉真自欺琢削為酒盃
規摹定州瓷荷
心雖淺狹鏡面良渺瀰持此壽佳客
到手不容辭曹侯
天下平定國豈其師一飲至數石
溫克頗似之風流越
王孫詩酒屢出奇喜我有此客
玉盃不徒施請君詰歐
陳問疾來何遲呼兒掃月榭
扶病及良時

歐季默以油煙墨二丸見餉各長寸許戲作小

詩

書窓拾輕煤佛帳掃餘馥辛勤破千夜收此一寸玉癡
人畏老死腐朽同草木欲將東山松涅盡南山竹墨堅
人苦脆未用歎不足且當注蟲魚莫草三千牘

明日復以大魚為餽重二十斤且求詩故復戲
之

漢庭九尺人誰似老方朔那將一寸金令足三冬學餉

魚欲自洗鱗尾光卓犖我是騎鯨手聊堪充鹿角

和趙景貺栽檜

汝陰多老檜處處屯蒼雲地連丹砂井物化青牛君時

有再生枝

頴之靈壇觀亦有再生檜

還作左紐紋王孫有古意書室

延清芬應憐四孺子不墮凡木羣體備松柏姿氣含芝

朮薰初扶鶴立骨未出龍纏筋巢根白蟻亂網葉秋蟲

紛乃知蔽芾初甚要封植勤他年皮三寸狐鼠了不聞

葉待制求先墳永慕亭詩

靈區有異產化國無潛珍承平百年間簪纓半齊民建
溪富竒偉葉氏初隱淪森然見喬木其下維德人佳哉
鬱葱葱氣若鳳與麟聯翩出儒將豈惟十朱輪新松無
鹿觸舊柏有烏馴待公歸上冢淚葉乃肯春

與趙陳同過歐陽叔弼新治小齋戲作

江湖渺故國風雨傾舊廬東來三十年愧此一束書尺
椽亦何有而我常容居美君開此室容膝真有餘拊床
琴動搖弄筆窻明虛後夜龍作雨天明雪填渠

時方禱
雨龍祠

作此句時星斗燦然四
更風雨大至明日乃雪

夢回聞剝啄誰乎趙陳予添丁

走沽酒通德起挽蔬主孟當啗我玉鱗金尾魚一醉忘
其家此身自蘧蔭

聚星堂雪 并叙

元祐六年十一月一日禱雨張龍公得小雪與客會飲
聚星堂忽憶歐陽文忠公作守時雪中約客賦詩禁體
物語於艱難中特出奇麗爾來四十餘年莫有繼者僕
以老門生繼公後雖不足追配先生而賓客之美殆不

減當時公之二子又適在郡故輒舉前令各賦一篇以
為汝南故事云

憲前暗響鳴枯葉龍公試手行初雪映空先集疑有無
作態斜飛正愁絕衆賓起舞風竹亂老守先醉霜松折
恨無翠袖點橫斜祇有微燈照明滅歸來尚喜更鼓永
晨起不待鈴索掣未嫌長夜作衣稜却怕初陽生眼纈
欲浮大白追餘賞幸有回飈驚落屑糝糊檜頂獨多時
厯亂瓦溝裁一瞥汝南先賢有故事醉翁詩話誰續說

當時號令君聽取白戰不許持寸鐵

歐陽叔弼見訪誦陶淵明事歎其絕識叔弼既去感慨不已而賦此詩

淵明求縣令本緣食不足束帶向督郵小屈未為辱翻然賦歸去豈不念窮獨重以五斗米折腰營口腹云何元相國萬鍾不滿欲胡椒銖兩多安用八百斛以此殺其身何翅抵鵲玉往者不可悔吾其反自燭

喜劉景文至

天明小兒更傳呼髯劉已到城南隅尺書真是髯手迹
起坐熨眼知有無今人不作古人事今世有此古丈夫
我聞其來喜欲舞病自能起不用扶江淮久旱塵土惡
朝來清雨濯鬢鬚相看握手了無事千里一笑無乃迂
平生所樂在吳會老死欲葬杭與蘇過江西來二百日
冷落山水愁吳妹新堤舊井各無恙參寥六一豈念吾
別後新詩巧摹寫袖中知有錢塘湖

禱雨龍公既應劉景文有詩次韻

張公晚為龍，抑自龍中來。伊昔風雲會，吐嗟潭洞開。精
誠苟可貫，賓主真相陪。洞簫振羽舞，白酒浮雲壘。言從
關洲妃，遠去焦氏臺。倒傾瓶中雨，一洗麥上埃。破旱不
論功，乘雲却空回。嗟龍與我輩，用意豈遠哉。使君今子
義，英風冠東萊。笑說龍為友，幽明莫相猜。

劉景文家藏樂天身心問答三首戲書一絕其
後

淵明形神自我樂，天身心相物而今月下三人他。日當

成幾佛

西湖戲作

一士千金未易償我從陳趙兩歐陽
舉鞭拍手笑山簡
祇有并兒一葛強

送歐陽季默赴闕

先生豈止一懷祖郎君不減王文度
滕上幾日今白鬚
令我眼中見此父汝南相從三晦朔
君去苦早我來暮
霜風淒緊正脫木潁水清淺可立鷺
莫辭白酒瀉香泉

已覺扁舟掠新渡坐看士衡執別手更遣夢得出奇句
郎君可是堯庫人乃使驥驟隨蹇步置之行矣無足道
賢愚豈在遇不遇

用前韻作雪詩留景文

萬松嶺上黃千葉載酒年年踏松雪劉郎去後誰復來
花下有人心斷絕東齋夜坐搜雪句兩手龜拆霜須折
無情豈亦畏嘲弄穿簾入戶吹燈滅紛紛兒女爭所似
碧海長鯨君未掣朝來雲漢接天流顧我小詩如點纈

歐陽陳趙在戶外急掃中庭鋪木屑交遊雖似雪柏堅
聚散行作風花瞥晴光融作一尺泥歸有何事真無說
泥乾路穩放君去莫倚馬蹄如踏鐵

和劉景文見贈

元龍本志陋曹吳豪氣崢嶸老不除失路今為噲等伍
作詩猶似建安初西來為我風薰面獨卧無人雪縞廬
留子非為十日飲要令安世誦亡書

和劉景文雪

占雨又得雪龜寧欺我哉似知吾輩喜故及醉中來童子愁冰硯佳人苦膠盃那堪李常侍入蔡夜銜枚

次前韻送劉景文

白雲在天不可呼明月豈肯留庭隅怪君西行八百里清坐十日一事無路人不識呼尚書但見凜凜雄千夫

君一馬兩僕率然相訪逆旅多呼尚書意謂君都頭也

豈知入骨愛詩酒醉倒正

欲蛾眉扶一篇向人寫肝肺四海知我霜鬢鬚

君前有詩見寄

云四海共知霜鬢滿重陽曾插菊花無

歐陽趙陳皆我有豈謂夫子駕復

迂爾來又見三黜柳共此暖熱餐醴蘇酒殺酸薄紅粉

暗祇有潁水清而妹一朝寂寞風雨散對影誰念月與

吾

郡中日與歐陽叔弼趙景貺陳履常相從而景文復至不數日柳戒之亦見過賓客之盛頃所未有然不

數日叔弼景文戒之皆去矣

何時歸帆泝江水春酒一變甘棠湖

景文

近卜居九江近甘棠湖

以屏山贈歐陽叔弼

漫郎天骨清生與世俗異學道新有得為貧聊復仕每
於紅塵中常起青霞志屏山輟贈子莫遣汗簪珥寓目

紫翠間安眠本非睡夢中化為鶴飛入長松寺

新渡寺席上次趙景貺陳履常韻送歐陽叔弼
比來諸君唱和叔弼但袖手旁睨而已臨別
忽出一篇頗有淵明風致坐皆驚歎

神屠不目全妙額惟粧半更刀乃族庖倚市必醜悍平
生魏公籌忽斲郢人墁詩書亦何用達道須此館多言
雖數窮微中或排難子詩如清風琴琴發將旦胡為久
閉匿綺語真自患許時笑我癡隔屋相咏歎竟識彥道

否絕叫呼百萬清朝固多士人門子皆冠莫言清潁水
從此隔河漢異時我獨來得魚楊柳貫持歸不忍食尺
素解悽斷中有清圓句銅丸飛柘彈春愁結凌澌正待
一笑泮百篇儻寄我呻吟鄭人緩

東坡全集卷十九

欽定四庫全書薈要卷一萬四千八百五十二

長部

東坡全集卷二十

宋 蘇軾 撰

詩五十六首

次韻趙景貺春思且懷吳越山水

歲華來無窮老眼久已靜春風如繫馬未動意先騁西
湖忽破碎鳥落魚動鏡縈城理枯瀆放閘起膠艇願君
營此樂官事何時竟

清河西湖三閘督君成之

思吳信偶然出處付

前定飄然不繫舟乘此無盡興醉翁行樂處草木皆可

敬明朝游北渚急掃黃葉徑白酒真到齊紅裙已放鄭
酒尚有香泉一壺為樂
全先生服不作樂也

次韻陳履常張公龍潭

經明宣城宰家此百尺瀾鄭翁不量力敢以非意干玄

黃雜兩戰絳青表雙蟠

事見龍
公碑

烈氣斃強敵仁心惻饑

寒精誠禱必赴苟簡求亦難蕭條麥蕪枯浩蕩日月寬
念子無吏責十日勤征鞍春蔬得雨雪少助先生槃龍
不憚往來而我獨宴安閉閣默自責神交清夜關

竹間亭小酌懷歐陽叔弼季默呈趙景貺陳履

常

歲暮自急景我閒方緩觴醉餘西湖晚步轉北渚長地
坐略少長意行無澗岡久知薺麥青稍喜榆柳黃盎盎
春欲動潏潏夜未央水天鷗鷺靜月霧松檜香撫景方
晚晚懷人重淒涼豈無一老兵坐念兩歐陽我意正麋
鹿君才亦圭璋此會恐難久此歡不可忘

臘梅一首贈趙景貺

天工點酥作梅花此有臘梅禪老家蜜蜂採花作黃蠟
取蠟為花亦其物天工變化誰得知我亦兒嬉作小詩
君不見萬松嶺上黃千葉玉葉檀心兩奇絕醉中不覺
度千山夜聞梅香失醉眠歸來却夢尋花去夢裏花仙
覓奇句此間風物屬詩人我老不飲當付君君行適吳
我適越笑指西湖作衣鉢

送王疎朝散赴闕

我家衡山公清而畏人知臧否不出口默識如著龜擢

子拱把中云有驥駮姿胡為三十載尚作窮苦詞丈夫
不妄語未効此可疑場來清潁上淚濕中郎詩怪我一
年長而作十年衰同時幾人在豈敢怨白髭願言指松

栢永與霜雪期

伯父為衡州日與
君相知有送行詩

次韻致政張朝奉仍招晚飲

掃白非黃精輕身豈胡麻怪君仁而壽未覺生有涯曾
經丹化米親授棗如瓜雲烝作霧楷火滅嘆雨已自此
養鉛鼎無窮走河車至今許玉斧猶事萼綠華

張曾見
永州何

仙姑得藥餌之人疑其以此壽也故
有丹化米萼綠華之句皆女仙事
我本三生人疇昔

一念差前生或草聖習氣餘驚蛇
儒臞謝赤松佛縛慙
丹霞時時一篇出擾擾四座譁清詩
得可驚信美詞多
夸回車入官府治具隨貧家萍蘼與
豆粥亦可成咄嗟

閻立本職貢圖

貞觀之德來萬邦浩如滄海吞河江
音容儻獐服奇龐
橫絕嶺海逾濤瀧珍禽現產爭牽扛
名王解辮却蓋幢
粉本遺墨開明窓我喟而作心未降
魏徵封倫恨不雙

次韻王滌州見寄

斯人何似似春雨歌舞農夫怨行路君看永叔與元之
坎軻一生遭口語兩翁當年鬢未絲玉堂揮翰手如飛
教得滌人解吟咏至今里巷嘲輕肥君家聯翩盡卿相
獨來坐歎谿山上笑捐浮利一雞肋多取清名幾熊掌
丈夫自重貴難售兩翁今與青山久後來太守更風流
要伴前人作詩瘦我勸承明苦求出到處遺蹤尋六一
憑君試與問琅琊許我來游莫難色

趙景貺以詩求東齋榜銘昨日聞都下寄酒來
戲和其韻求分一壺作潤筆也

王孫天麒麟眸子奧而徹囊空學愈富屋陋人更傑我
老書益放筆落坐爭掣欲求東齋銘要飲西湖雪長餅
分未到小硯乾欲裂不似淳于髡一石要燭滅

洞庭春色

并引

安定郡王以黃柑釀酒謂之洞庭春色色香味三絕以
餉其猶子德麟德麟以飲予為作此詩醉後信筆頗有

省拖風氣

二年洞庭秋香霧長嘆手今年洞庭春玉色疑非酒賢

王文字飲醉筆蛟蛇走既醉念君醒遠餉為我壽餅開

香浮座棧凸光照牖方傾安仁醪潘岳笙賦云披黃苞以授柑傾綠瓷以酌

醪莫遣公遠齏明皇食柑凡千餘枚皆闕一瓣問進柑使者云中塗皆有道士齏之蓋羅公遠

也要當立名字未可問升斗應呼釣詩鈎亦號掃愁帚

君知蒲萄惡止是嫫姆黥須君灑海盃澆我談天口

送路都曹并引

乖崖公在蜀有錄曹參軍老病廢事公責之曰胡不歸
明日參軍求去且以詩留別其略曰秋光都似宦情薄
山色不如歸意濃公驚謝之曰吾過矣同僚有詩人而
吾不知因留而慰薦之予幼時聞父老言恨不問其姓
名今都曹路君以小疾求致仕予誦此事留之不可乃
採前人意作詩送之并邀趙德麟陳履常各賦一篇
積雪困桃李春心誰為容淮光釀山色先作歸意濃我
亦倦游者君恩繫踈慵欲留耿介士伴我衰遲蹤吏課

升斗積崎嶇等鉛春那將露電身坐待收千鍾結髮空
百戰市人看先封誰能搔白首抱關望夕烽子意亮已
成我言寧復從恨無乖崖老一洗芥蒂胸我田荆谿上
伏臘亦粗供懷哉江南路會作林下逢

次韻陳履常雪中

可憐擾擾雪中人饑飽終同寓一塵老檜作花真強項
凍鳶儲肉巧謀身忍寒吟咏君堪笑得煖謹呼我未貧
坐聽屐聲知有路擁裘來看玉梅春

二鮮于君以詩文見寄作詩為謝

我懷元祐初珪璋滿清班維時南隆老奉使獨未還迂

叟向我言青齊歲方艱斯人乃德星遣出虛危間

司馬溫公

謂軾曰子駿福星也京東人困甚且令往彼

召用既晚矣天命良復慳一朝

失老驥寂寞空帝閑至今清夜夢枕衾有餘潛喜聞二

三子結髮師閔顏高論傾河漢清詩鳴珮環遙知三日

雪積玉埋崧山誰念此幽桂坐蒙榛與管故人在潁尾

投詩清冷灣

次韻趙德麟雪中惜梅且餉柑酒三首

千花未分出梅餘
遣雪摧殘計已疎
卧聞點滴如秋雨
知是東風為掃除

閨苑千葩映玉宸
人間祇有此花新
飛靈要欲先桃李
散作千林火迫春

蹀躞嬌黃不受鞿
東風暗與色香歸
偶逢白墮爭春手
遣入王孫玉笋飛

和陳傳道雪中觀燈

新年樂事歎何曾
閉閣燒香一病僧
未忍便傾澆別酒
且來同看照愁燈
潁魚躍處新亭近
湖雪消時畫舫升
祇恐樽前無此客
清詩還有士龍能

閱世亭詩贈任仲微

任公鎮西南嘗贈繞朝策
當時若盡用善陣無赫赫
淒涼十年後邪正久已白
却留封德彞天意眇難測
象賢真驥種號詆甘百謫
豈云報私讐禍福指絡脈
高才食舊德但恐里門窄
傷心千騎歸贈印黃壤
隅惟有亭前

檜閱世不改色千年與井在記此王粲宅

新渡寺送任仲微

春陰欲落雪野氣方升雲我游清潁尾想見翠被君古
來聚散地與子復言分倦游安稅駕瘦田夫歸耘獨宿
古寺中荒雞亂鳴羣送子以曉角幽幽醒時聞

送運判朱朝奉入蜀七首

藹藹青城雲娟娟峨眉月隨我西北來照我光不滅
我在塵土中白雲呼我歸我遊江湖上明月濕我衣

岷峨天一方雲月在我側謂是山中人相望了不隔
夢尋西南路默數長短亭似聞嘉陵江跳波吹錦屏
送君無一物清江飲君馬路穿慈竹林父老拜馬下
不用驚走藏使者我友生聽訟如家人細說為汝評
若逢山中友問我歸何日為話腰脚輕猶堪踏泉石

病中夜讀朱博士詩

病眼亂燈火細書數塵沙君詩如秋露淨我空中花古
語多妙寄可識不可誇巧笑在頰頰哀音餘摻摻曾坑

一掬春紫餅供千家懸知貴公子醉眼無真茶崎嶇爛
石上得此一寸芽緘封勿浪出湯老客未嘉

趙德麟餞飲湖上舟中對月

老守惜春意主人留客情官餘閒日月湖上好清明新
火發茶乳溫風散粥餠酒闌紅杏閣日落大堤平清夜
除燈坐孤舟擘岸撐棹君憤未墮對此月猶橫

贈朱遜之并引

元祐六年九月與朱遜之會議于潁或言洛人善接花

歲出新枝而菊品尤多遜之曰菊當以黃為正餘可鄙也昔叔向聞駸蔑一言知其為人予於遜之亦云

黃花候秋節遠自夏小正坤裳有正色鞠衣亦令名一從人偽勝遂與天力爭易性寓非族改顏隨所令新奇既易售粹駁宜相傾疾惡逢伯厚識真似淵明君言我所印世論誰改評願君為霜風一掃紫與頰

和趙德麟送陳傳道

二陳既妙士兩歐惟德人王孫乃龍種世有籟雲麟五

君從我游傾寫出怪珍俗物敗人意茲游實清醇邠知
有聚散佳夢失欠伸我舟下清潁淮水吹玉塵君行踏
曉月疎木挂寸銀尚寄別後詩翦刻淮南春

上巳日與二子迨過游塗山荆山記所見

此生終安歸還軫天下半場來乘櫟廟復作微禹歎自昔

南河赴杭州過此從祠及彼呱有啓廟像設偶此粲謂塗山氏

秦祖當侑坐廟有伯翳夏郊亦薦裸有鯀廟可憐淮海人尚記

弧矢旦淮南人謂禹以六月六日生是日數萬人會山上雖傳記不載然相傳如此荆山碧

相照楚水清可亂別人有餘坑美石肖溫瓚

荆山下有卞氏採玉

坑石色如玉不受鑿刻取出山下輒變色不復溫瑩

龜泉木杪出牛乳石池漫

龜泉

在荆山下色白而甘真陸羽所謂石池漫流者有石記云唐貞元中隨白龜流出

小兒強好古

侍史笑流汗歸時蝙蝠飛炬火記遠岸

淮上早發

澹月傾雲曉角哀小風吹水碧鱗開此生定向江湖老
默數淮中十往來

次韻徐仲車

仲車耳聲

惡衣惡食詩愈好恰似霜松嘖春鳥蒼蠅莫亂遠雞聲

世上誰如公覺早八年看我走三州

元豐八年予赴登州元祐四年赴杭

州今赴揚州皆見仲車

月自當空水自流人間擾擾真螻蟻應笑

人呼作鬪牛

次韻林子中春日新堤書事見寄

東都寄食似孤雲僕被真成一宿賓收得玉堂揮翰手
却為淮月弄舟人羨君湖上齋搖碧笑我花時甌有塵

為報年來殺風景連江夢雨不知春

來詩有芍藥春之句揚州近歲率為

此會用花十餘萬枝吏緣
為奸民極病之故罷此會

送陳伯修察院赴闕

裕陵固天縱筆有雲漢姿嘗重連山象不數秋風辭龍
騰與虎變狸豹復何施我窮真有數文字乃見知聞君
射策日妙語發疇咨一日喧萬口驚倒同舍兒豈知二
十年道路猶遲遲苦言如藥石瞑眩終見思屈信反覆
手獨於君可疑四門方穆穆行矣及此時

送張嘉父長官

都城昔傾蓋駿馬初服輶再見江湖間秋鷹已離鞬于
今三會合每進不少留豫章既可惜瑚璉誰當收微官
有民社妙割無雞牛歸來我益敬器博用自周百年子
初筵我已迫旅酬但當記苦語高節貫白頭

軾在潁州與趙德麟同治西湖未成改揚州三
月十六日湖成德麟有詩見懷次韻

太山秋毫兩無窮鉅細本出相形中大千起滅一塵裏
未覺杭潁誰雌雄

來詩云與
杭爭雄

我在錢塘拓湖淥大堤士

女爭昌丰六橋橫絕天漢上北山始與南屏通忽驚二
十五萬丈老葑席卷蒼雲空竭來潁尾弄秋色一水縈
帶昭靈宮坐思吳越不可到借君月斧修瞳朧二十四
橋亦何有換此十頃玻璃風雷塘水乾禾黍滿寶釵耕
出餘鸞龍明年詩客來弔古伴我霜夜號秋蟲

德麟見
約來揚

寄居亦有
意求揚伴

次韻趙德麟西湖新成見懷絕句

壺中春色

謂洞庭
春色也

飲中仙騎鶴東來獨惘然猶有趙陳

同李郭不妨同泛過湖船

再次韻趙德麟新開西湖

使君不用山鞠窮饑民自逃泥水中欲將百瀆起凶歲
免使甌石愁揚雄西湖雖小亦西子縈流作態清而丰
千夫餘力起三閘焦陂下與長淮通十年憔悴塵土窟
清澗一洗啼痕空王孫本自有仙骨平生宿衛明光宮
一行作吏人不識正似雲月初朦朧時臨此水照冰雪
莫遣白髮生秋風定須却致兩黃鵠新與上帝開濯龍

湖成君歸侍帝側燈花已綴釵頭蟲

予以潁人苦飢奏乞留黃河夫萬人

修境內溝洫詔許之
因以餘力浚治此湖

到官病勅未嘗會容毛正仲惠茶乃以端午小

集石塔戲作一詩為謝

我生亦何須一飽萬想滅胡為設方丈養此膚寸舌爾
來又衰病過午食輒噎繆為淮海帥每愧厨傳缺爨無
欲清人奉使免內熱空煩赤泥印遠致紫玉玦為君伐
羔豚歌舞菰黍節禪憲麗午景蜀井出冰雪坐客皆可

人鼎器手自絜金釵候湯眼魚蟹亦應訣遂令色香味
一日備三絕報君不虛授知我非輕啜

雙石 并引

至揚州獲二石其一綠色岡巒迤邐有穴達于背其一
玉白可鑒漬以盆水置几案間忽憶在潁州日夢人請
住一官府榜曰仇池覺而誦杜子美詩曰萬古仇池穴潛
通小有天乃戲作小詩為僚友一笑

夢時良是覺時非汲水埋盆故自癡但見玉峯橫太白

便從鳥道絕峨眉
秋風與作煙雲意
曉日令涵草木姿
一點空明是何處
老人真欲住仇池

次韻和晁無咎學士相迎

少年獨識晁新城
閉門却掃卷旆旌
胸中自有談天口
坐却秦軍發墨守
有子不為謀置錐
虹霓吞吐忘寒饑
端如太史牛馬走
嚴徐不敢連尻脰
裴回未用疑相待
枉尺知君有家戒
避人聊復去瀛洲
伴我真能老淮海
夢中仇池千仞巖
便欲攬我青霞幘
且須還家與婦計

我本歸路連西南老人飲酒無人佐獨看紅藥傾白墮
每到平山憶醉翁懸知他日君思我路旁小兒笑相逢
齊歌萬事轉頭空賴有風流賢別駕猶堪十里卷春風
次韻范淳父送秦少章

宿緣在江海世網如予何西來庾公塵已濯長淮波十
年淮海人初見一麥禾但欣爭訟少未覺舟車多秦郎
忽過我賦詩如卷阿句法本黃子謂魯直也二豪與措磨其

少游與張文潛嗟我久離羣逝將老西河後生多名士欲薦空

悲歌小范真可人獨肯勤收羅瘦馬識駮耳枯桐得雲
和近聞館李生李薦方叔病鶴借一柯贈行苦說我妙語慰
蹉跎西羌已解仇烽火連朝那坐籌付公等吾將寄潛
沈

靈隱前一首贈唐林夫

靈隱前天竺後兩澗春涼一靈鷲不知水從何處來跳
波赴壑如奔雷無情有意兩莫測肯向冷泉亭下相縈
回我在錢塘六百日山中暫來不暖席今君欲作靈隱

居葛衣草履隨僧蔬能與冷泉作主一百日不用二十四考書中書

滕達道挽詞二首

先帝知公早虛懷第一人至今詩禮將惟數武宣臣材

大雖難用時來亦少信高平風烈在威敏典刑新

公少受知

於范希文孫元脫

空試乘邊策寧留相漢身淒涼舊部曲淚濕

塚前麟

雲夢連江雨樊山落木秋公方占賈鵬我正買龔牛共

有江湖樂俱懷歎
畝畝憂荆溪欲歸老浮玉偶同游
翫髒儀刑在驚呼
歲月道回頭雜歌哭
挽語不成謳

次韻蘇伯固遊蜀岡送李孝博奉使嶺表

新苗未沒鶴老葉方翳蟬
綠渠浸麻水白板燒松煙
笑窺有紅頰醉卧皆華顛
家家機杼鳴樹樹黎棗懸
野無佩犢子府有騎鶴仙
觀風嶠南使出相山東賢
渡江弔狼石過嶺酌貪泉
與君步徙倚望彼脩連娟
願及南枝謝早隨北鴈翩
歸來春酒熟共看山櫻然

送晁美叔

我年二十無朋儔當時四海一子由君來扣門如有求
頽然病鶴清而脩醉翁遣我從子游翁如退之蹈軻丘

尚欲放予出一頭

嘉祐初軾與子由寓興國浴室美叔忽見訪云君從歐陽公游久矣公令

我來與子定交謂子必名世老夫亦須放他出一頭地

酒醒夢斷四十秋病鶴不

病骨愈蚪惟有我顏老可羞醉翁賓客散九州幾人白
髮還相收我如懷祖拙自謀正作尚書已過優君求會

稽實良籌往看萬壑爭交流

君近乞越州

王文玉挽詞

才名誰似廣文寒月斧雲斤琢肺肝玄晏一生都卧病
予雲三世不遷官幽蘭空覺香風在宿草何曾淚葉乾
猶喜諸郎有曹志文章還復富波瀾

送芝上人游廬山

二年閱三州我老不自惜團團如磨牛步步踏陳迹豈
知世外人長與魚鳥逸老芝如雲月炯炯時一出比年
三見之常若有所適逝將走廬阜計濶道愈密吾生如

寄耳出處誰能必江南千萬峯何處訪子室

送程德林赴真州

君為縣令元豐中吏貪功利以病農君欲言之路無從
移書諫臣以自適諫臣寔受之也元豐天子為改容我時疋馬

江西東問之逆旅言頗同老人愛君如劉寵小兒敬君
如魯恭爾來明目達四聰收拾駟駿冀北空君為赤令
有古風政聲直入明光宮天廡如海養羣龍并收其子

豈不公

君之子祁舉制策文學行義為時所稱

白沙何必煩此翁

谷林堂詩

深谷下窈窕高林合扶疎美哉新堂成及此秋風初我
來適過雨物至如娛予穉竹真可人霜節已專車老槐
苦無賴風花吹填梁山鴉爭呼號谿蟬獨清虛寄懷勞
生外得句幽夢餘古今正自同歲月何必書

予少年頗知種松手植數萬株皆中梁柱矣都
梁山中見杜輿秀才求學其法戲贈二首

露宿泥行草棘中十年春雨養髯龍如今尺五城南杜

欲問東坡學種松

君方掃雪收松子我已開榛得茯苓為問何如插楊柳
明年飛絮作浮萍

行宿泗間見徐州張天驥次舊韻

二年三躡過淮舟欵段還逢馬少游無事不妨長好飲
著書自要且窮愁孤松早偃元非病倦鳥雖還豈是休
更欲河邊幾來往祇今霜雪已蒙頭

次韻劉景文贈傅曦秀才

窈眇文章宜和寡崢嶸肝肺亦交難未能飛瓦彈清角
肯便投泥戲潑寒忽見秋風吹洛水遙知霜葉滿長安
詩成送與劉夫子莫遣孫郎帳下看

在彭城日與定國為九日黃樓之會今復以是
日相遇于宋凡十五年憂樂出處有不可勝
言者而定國學道有得百念灰冷而顏益壯
顧予衰病心形俱瘁感之作詩

菊殘萸囊自古傳長房寧復是臞仙應從漢武橫汾日

數到劉公戲馬年對玉山人雖老矣見恒河性故依然
玉郎九日詩千首今賦黃樓第二篇

九日次定國韻

朝菌無晦朔蟋蟀疑春秋南柯已一世我眠未轉頭仙
人視吾曹何異蜂蟻稠不知蠻觸氏自有兩國憂我觀
去來今未始一念留奔馳竟何得而起無窮羞玉郎誤
涉世屢獻久不疇黃金散行樂清詩出窮愁俛仰四十
年始知此生浮軒裳陳道路往往兒童收封侯起大第

或是君家騶似聞負販人中有第一流炯然徑寸珠藏
此百結裘意行無車馬倏忽略九州邂逅獨見之天與
非人謀笑我方醉夢衣冠戲沐猴力盡病騏驥伎窮老
伶優北山有雲根寸田自可耰會當無何鄉同作逍遙
遊歸來城郭是空有纍纍丘

召還至都門先寄子由

老身倦馬河堤永踏盡黃榆綠槐影荒雞號月未三更
容夢還家得俄頃歸老江湖無歲月未填溝壑猶朝請

黃門殿中奏事罷詔許來迎先出省已飛青蓋在河梁
定餉黃封兼賜茗遠來無物可相贈一味豐年說淮潁
次韻定國見寄

還朝如夢中雙闕眩金碧復穿鷓鴣行強寄麋鹿迹勞
生苦晝短展轉不能夕默坐數更鼓流水夜自逆故人
為我謀此志何由畢越吟知聽否誰念病莊烏時方請越

次韻蔣穎叔錢穆父從駕景靈宮二首

歸來病鶴記城闔舊踏松枝雨露新半白不羞垂領髮

軟紅猶戀屬車塵
雨收九陌豐登後
日麗三元下降辰
粗識君王為民意
不才何以助精禋

前輩戲語有西湖風月不如東華軟

紅香
土

與君竝直記初元
白首還同入禁門
玉殿齊班容小語

霜廷稽首泣微溫

適與穆父竝拜庭中地皆流濕相與小語道之

病貧賜茗浮

銅葉老怯香泉灑
寶樽回首鷓行
有人傑坐知羌虜是
游魂

東坡全集卷二十

謹案卷十九第十一頁前二行商也哀未散按施
本散作忘

第十一頁前五行陋矣陶士行刊本行訛衡據晉
書改


第二十二頁前四行頗有淵明風致刊本致訛製
據施本改

卷二十第九頁後八行世有籥雲麟刊本麟訛鱗
據施本改

第十四頁後一行秋風與作煙雲意刊本風與訛

險欲據施本改





總校官庶吉士臣張能照

校對官編修臣朱攸

謄錄監生臣宋錯

欽定四庫全書薈要

集部

東坡全集卷二十一



詳校官助教臣常循


欽定四庫全書薈要卷一萬四千八百五十三

集部

東坡全集卷二十一

宋 蘇軾 撰

詩六十四首



軾近以月石硯屏獻子功中書公復以涵星硯
獻純父侍講子功有詩純父未也復以月石
風林屏贈之謹和子功詩并求純父數句

紫潭出玄雲翳我潭中星獨有潭上月倒挂紫翠屏我
老不看書默坐養此昏花睛時時一開眼見此雲月眼

自明久知世界如泡影大小真偽何足評笑彼三子歐

蘇梅無事自作雪羽爭

事見三
人詩集

故將屏硯送兩范要使

珠璧栖牕櫺大范忽長謠語出月脇令人驚

皇甫湜曰
穿天心出

月脅意外驚
人語非尋常

小范當繼之說破星心如雞鳴

孟郊聞雞
詩云似開

孤月口能
說落星心

牀頭復一月下有風林橫急送小范家護此

涵星泓願從少陵博一句山木盡與洪濤傾

次韻范純父涵星硯月石風林屏詩

月次于房厯三星斗牛不神箕獨靈簸搖桑榆盡西靡

影落蘇子硯與屏天工與我兩厭事孰居無事為此形
與君持索待帷幄回到溫室觀堯墓自憐太史牛馬走
杖等卜祝均倡伶欲留衣冠挂神武便擊雲水歸南溟
陶泓不稱管城沐醉石可助平泉醒故持二物與夫子
欲使妙質留天庭但令滋液到枯槁勿遣光景生晦冥
上書挂名豈待我獨立自可當雷霆我時醉眠風林下
夜與漁火同青熒撫物懷人應獨歎作詩寄子誰當聽

次韻錢穆父會飲

彈冠恨不早挂冠常苦遲盛服每假寐角闕時伏思東
門未祖道西山空挂頤逝將江海去安此麋鹿姿要當
謀三徑何暇擇一枝與君幾合散得酒忘淳滴君談似
落屑我飲如奕棋

世有作詩如奕棋奕棋如飲酒飲酒乃天戒之語僕此二事皆不能居

官不任事造物真見私主人獨賢勞金穀方流馳行人
亦結束杖杜乃歸期公卿雖少安河流正東醜我得會
稽去方回良不癡

次韻穆父尚書侍祠郊丘瞻望天光退而相慶

引滿醉吟

千章杞梓蔭雲天，樗散誰收老鄭虔。
喜氣到君浮白裏，豐年及我挂冠前。
令嚴鐘鼓三更月，野宿貔貅萬竈烟。
太息何人知帝力，歸來金帛看頰肩。

郊祀慶成詩

帝出乘昌運，天心予太平。
文章三代繼，制作七年成。
大祀乾坤合，剛辰日月明。
泰壇朝掃地，魄寶夜垂精。
仰御圓蒼蓋，環觀海岳城。
北流吞朔易，西極落攬槍。
升燎靈

光荅回鑾瑞霧迎
需雲徧枯槁解雨
達勾萌可頌非天
德因箴亦下情
民言知有酌帝謂
本無聲富國由崇
儉祈年在好生無
心斯格物克已自
消兵化國安新政
孤臣反舊耕還將
清廟什留與野人
賡

次韻奉和錢穆父
蔣穎叔王仲至詩
四首

見和西湖月下聽琴

謾謾松下風藹藹
壠上雲聊將竊比
我不堪持寄君半
生寓軒冕一笑當
琴尊良辰飲文字
晤語無由醺我有

鳳鳴枝背作蛇蚺紋月明委靜照心清得奇聞當呼玉
澗手一洗羯鼓昏請歌南風曲猶作虞書渾

家有雷琴
甚奇古玉

澗道人崔閑妙於
雅聲當呼使彈

見和仇池

上窮非想亦非非下與風輪共一癡翠羽若知牛有角
空併何必井之眉還朝暫接鷓鴣翼謝病行收麋鹿姿
記取和詩三益友他年弭節過仇池

玉津園

承平苑囿雜耕桑六聖勤民計慮長碧水東流還舊派

玉津分蔡河上
流復合於下

紫壇南峙表連岡不逢遲日鶯花亂空

想疎林雪月光千畝何時躬帝藉斜陽寂歷瑣雲莊

藉田

竊脂方紀瑞布穀未催耕魚沫依蘋渚蝸涎上綵楹江
湖來夢寐簑笠負平生琴裏思歸曲因君一再行

頃年楊康功使高麗還奏乞立海神廟板橋僕
嫌其地湫隘移書使遷之文登因古廟而新

之揚竟不從不知定國何從見此書作詩稱
道不已僕不復記其云何也次韻答之

退之仙人也遊戲於斯文談笑出偉奇鼓舞南海神頃
年三韓使幾為鰐鯨吞歸來築祠宇要使百賈奔

板橋商賈

所聚我欲遷其廟下數浮空羣

謂登州海市

移書竟不從信非

磊落人公胡為拳拳繫此空中雲作詩頌其美何異刻
劍痕我今已括囊象在六四坤

沐浴啓聖僧舍與趙德麟邂逅

南山北闕兩非真東潁西湖迹已陳
季子來歸初可喜
老聃新沐定非人酒清不醉休休暖
睡穩如禪息息勻
自笑塵勞餘一念明年同泛越溪春

次韻王仲至喜雪御筵

三軍喜氣鑠飛花睡起空驚月在沙
未集驂駟金駉裹
故殘鳩鵲玉橫斜偶還仗內身如寄
尚憶江南酒可賒
宣勸不多心自醉強扶衰白拜君嘉

僕所藏仇池石希代之寶也王晉卿以小詩借

觀意在於奪僕不敢不借然以此詩先之

海石來珠宮秀色如蛾綠坡陀尺寸間宛轉陵巒足連

娟二華頂空洞三茅腹初疑仇池化又恐瀛洲感慙慙

嶠南使餽餉淮東牧

僕在揚州程德孺由嶺南解官以此石見遺

得之喜無

寐與汝交不瀆盛以高麗盆藉以文登玉

僕以高麗所鑄大銅盆貯

之又以登州海石如碎玉者附其足

幽光先五夜冷氣壓三伏老人生如

寄衡茅久未卜一夫幸可致千里還相逐風流貴公子

竄謫武當谷見山應已厭何事奪所欲欲留嗟趙弱寧

許負秦曲傳觀慎勿許間道歸更速

次天字韻答岑巖起

一聲清蹕霧開天百辟心莊豈貌虔
回顧驚君珠玉側同升愧我粃糠前
裴回月色留壇影縹緲松香泛蠟煙
近制以椽燭松明易祝盆莫歎郎潛生白髮
聖朝求舊鄙鳶肩

石塔寺 并引

世傳王播飯後鐘詩蓋揚州石塔寺事也相傳如此戲
作此詩

饑眼眩東西詩腸忘蚤晏雖知燈是火不悟鐘非飯山
僧異漂母但可供一莞胡為三百年記憶作此訕齋廚
養若人無益祇遺患乃知飯後鐘閣棊蓋具眼

次韻蔣穎叔二首

扈從景靈宮

道人幽夢曉初還已覺笙簫下月壇風伯前驅清宿霧
祝融驟乘破朝寒英姿連壁從多士妙句鏘金和八鑿
已向詞臣得頗收

時穎叔新
除熙河帥

路人莫作老儒看

凝祥池

似知金馬客時夢碧雞坊
冰雪消殘臘煙波寫故鄉
鳴鑾自容與立馬久回翔
乞與三韓使新圖到樂浪

時高麗使

在都下每至勝境輒圖畫以歸

和叔益畫馬次韻

天驥德力備馬外龍麟中
皇天不遣言兀與圖畫同
駑駘飽官粟未受一洗空
十駕均一至何事籟雲風

王晉卿示詩欲奪海石錢
穆父王仲至蔣穎叔

皆次韻穆至二公以為不可許獨穎叔不然
今日穎叔見訪親覩此石之妙遂悔前語軾
以為晉卿豈可終閉不予者若能以韓幹二
散馬易之者蓋可許也復次前韻

相如有家山縹緲在眉綠誰云千里遠寄此一顰足平
生錦繡腸蚤歲蒸芻腹從教四壁空未遣兩峰感吾今
况衰病義不忘樵牧逝將仇池石歸泝岷山瀆守子不
貪寶完我無瑕玉故人詩相戒妙語予所伏一篇獨異

論三占從兩卜君家畫可數天驥紛相逐風駿掠原野
電尾梢澗谷君如許相易是亦我所欲今朝安西守來
聽陽關曲勸我留此峰他日來不速

軾欲以石易畫晉卿難之穆父欲兼取二物穎
叔欲焚畫碎石乃復次前韻并解三詩之意

春冰無真堅霜葉失故綠鷄疑鵬萬里竄笑夔一足二
豪爭攘袂先生一捧腹明鏡既無臺淨餅何用感

古蹴
感通

盆山不可隱畫馬無由牧聊將置庭宇何必棄溝瀆焚

寶真愛寶碎玉未忘玉久知公子賢出語耆年伏欲觀
博物妙故以求馬卜維摩既復捨天女還相逐授之無
盡燈照此久幽谷定心無一物法樂勝五欲三峨吾鄉
井萬里君部曲卧雲行歸休破賊見神速

晉卿將種
常有此志

生日蒙劉景文以古畫松鶴為壽且貺嘉篇次
韻為謝

問予一室間寧有千里廓塵心洗長松遠意發孤鶴生
朝得此壽死籍疑可落微言在叅同妙契藏九籥故人

有奇趣逸想寄幽壑霜枝謝寒暑雲翻無前却何須構
明堂未羨巢阿閣緬懷別時語復作數日惡詩腴固堪
餐字瘦還可愕高標忽在眼清夢了如昨君今曾等伍
志與湛輩各豈待相顧言方為不朽託子雲老執戟長
孺終主爵吾當追喬松子亦鄙衛霍

程德孺惠海中柏石兼辱佳篇輒復和謝

嵐薰瘴染却膚腴笑飲貪泉獨繼吳未欲連車收惹惹以
肯教沈網取珊瑚不知庾嶺三年別收得曹谿一滴無

但指庭前雙柏石要予臨老識方壺

次秦少游韻贈姚安世

帝城如海欲尋難肯捨漁舟到杏壇
剝啄扣君容膝戶
巍峩笑我切雲冠
問羊獨怪初平在
牧豕應同德曜看
肯把參同較同異
小窓相對為研丹

次丹元姚先生韻

浮生知幾何
僅熟一釜羹
那於俯仰間
用此委曲情
自憐無他腸
偶亦得此生
懸知當去客
中有不亡存
但恐

宿緣重每為習氣昏似聞梅子真近在吳市門未能肩
拊洪但欲目擊溫不敢扣門呼恐作踰垣奔且令紹介
先徐以方便論不學劉更生黃金鑄尚方不學房次律
身事問潁陽王烈亦何人叔夜未可量獨見神山開遽
餐石髓香至道尚聽瑩麗材終蹶張先生喜而笑幅巾
登我堂苦誓指黃壤要言刻青琅蓬萊在何許弱水空
相望且當從嵇阮聊復數山王達人友四海曲士守一
疆慎勿使形譟兒童驚夜光

次韻秦少游王仲至元日立春三首

省事天公厭兩回
新年春日併相催
慙慙更下山陰雪
要與梅花作伴來

已卯嘉辰壽阿同
願渠無過亦無功
明年春日江湖上

回首觚稜一夢中

子由一字同叔元
日已卯渠本命也

詞鋒雖作楚騷寒
德意還同漢詔寬
好遣秦郎供帖子

盡驅春色入毫端

立春日翰林學士
供詩帖子

上元侍飲樓上三首呈同列

澹月疎星遶建章
仙風吹下御爐香
侍臣鵠立通明觀
一朵紅雲捧玉皇

薄雪初消野未耕
賣薪買酒看升平
吾君勤儉倡優拙
自是豐年有笑聲

老病行穿萬馬羣
九衢人散月紛紛
歸來一點殘燈在
猶有傳柑遺細君

侍飲樓上則貴戚爭以黃柑遺近臣謂之傳柑蓋尚矣

送蔣穎叔帥熙河

并引

穎叔出使臨洮
軾與穆父仲至同餞之
各賦詩一篇以

今我來思為韻致遄歸之意軾得我字

西方猶宿師論將不及我苟無深入計緩帶我亦可承
明正須君文字粲藻火自薦雖云數留行終不果正坐
喜論兵臨老付邊瑣新詩出談笑僚友困掀簸我欲歌
杖杜楊柳方婀娜邊風事首虜所得蓋么麼願為魯連
書一射聊城竒陰功在不殺結草酌魏顆

再送蔣穎叔帥熙河二首

使君九萬擊鵬鷖肯為陽關一斷魂不用寬心九千里

安西都護國西門

餘刃西屠橫海鯤
應予詩讖是遊魂
歸來趁別陶弘景
看挂衣冠神虎門

次韻穎叔觀燈

安西老守是禪僧
到處應然無盡燈
永夜出遊從萬騎
諸羌入看擁千層
便因行樂令投甲
不用防秋更打冰
振旅歸來還侍燕
十分宣勸恐難勝

次韻王晉卿奉詔押高麗燕射

北苑傳呼陸楫郎東夷初識令君香天山自可三箭取
海國何勞一葦航宣勸不辭金盃側醉歸爭看玉鞭長
錦囊詩草勤收拾莫遣雞林得夜光

次韻錢穆父王仲至同賞田曹梅花

寒廳不知春獨立耿玉雪閉門愁永夜置酒及明發忽
驚庭戶曉未受煙雨沒浮光風宛轉照影水方折鬢霜
未易掃眉斧真自伐惟當此花前醉卧黃昏月

送襄陽從事李友諒歸錢塘

居杭積五歲自意本杭人故山歸無家欲卜西湖隣良
田不難買靜士誰當親髯張既超然老潛亦絕倫李子
冰玉姿文行兩清淳歸從三人遊便足了此身公堤不
改昨姥嶺行開新幽夢隨子去松花落衣巾

次韻吳傳正枯木歌

天公水墨自奇絕瘦竹枯松寫殘月夢回踈影在東窓
驚怪霜枝連夜發生成變壞一彈指乃知造物初無物
古來畫師非俗士妙想實與詩同出龍眠居士本詩人

能使龍池飛霹靂君雖不作丹青手詩眼亦自工識拔
龍眠胸中有千駟不獨畫肉兼畫骨但當與作少陵詩
或自與君拈秃筆東南山水相招呼萬象入我摩尼珠
盡將書畫散朋友獨與長缺歸來乎

送黃師是赴兩浙憲

世久無此士我晚得王孫寧非叔度家豈出次公門白
首沈下吏綠衣有公言哀哉吳越人久為江湖吞官自
倒帑廩飽不及黎元近聞海上港漸出水底村願君五

誇手招此半菽魂一見刺史天稍忘獄吏尊會稽入吾
手鏡湖小於盆比我東來時無復瘡痕存

送范中濟經略侍郎分韻賦詩軾得先字且贈

以魚枕盃四馬筮一

梁季久樂禍自焚豈非天兩鼠鬪穴中一勝亦偶然謀
初要百慮善後乃萬全廟堂選世將范氏真多賢仁風
被宿麥綠浪搖秦川號令聳毛羽先聲落虛弦我家天
一方去路城西偏投竿困障日賣劔行歸田贈君荆魚

孟副以蜀馬鞭一醉可以起毋令祖生先

書晁說之考牧圖後

我昔在田間但知羊與牛川平牛背穩如駕百斛舟舟
行無人岸自移我卧讀書牛不知前有百尾羊聽我鞭
聲如鼓鼙我鞭不妄發視其後者而鞭之澤中草木長
草長病牛羊尋山跨坑谷騰趨筋骨強煙叢雨笠長林
下老去而今空見畫世間馬耳射東風悔不長作多牛

翁

呂與叔學士挽詞

言中謀猷行中經關西人物數清英欲過叔度留終日
未識魯山空此生論議凋零三益友功名分付二難兄
老來尚有憂時歎此涕無從何處傾

丹元子示詩飄飄然有謫仙風氣吳傳正繼作
復次其韻

飛仙亦偶然脫命瞬息中惟詩不可擬如寫天日容夢
中哦七言玉丹已入懷一語遭虐綽失身墮蓬萊蓬萊至

今空護短不養才上界足官府謫仙應退休可憐吳與蘇
骭髀雪滿頭雪滿頭終當却與丹元子笑指東海乘桴浮
次王定國韻書丹元子寧極齋

仙人與吾輩寓迹同一塵何曾五漿餽但有爭席人寧
極無常居此齋自隨身人那識郝鑒天不留封倫誤落
世網中俗物愁我神先生忽扣戶夜呼祁孔賓便欲隨
子去著書未絕麟願挂神虎冠往卜飲馬鄰王郎濯紈
綺意與陋巷親南遊苦不早儻及尊鱸新

王仲至侍郎見惠穉枯種之禮曹北垣下今百
餘日矣蔚然有生意喜而作詩

翠枯東南美近生神嶽陰惜哉不可致霜根絡雲岑仙
風振高標香實隕平林偶隨樗櫟生不為樵牧侵忽驚
黃茅嶺稍出青玉鍼好事雖力取王城少知音豈無換
鸞手但知覓來禽高懷獨夫子一見捐索金得之喜不
寐贈我意殊深公堂開後閤凡木愧華簪栽培一寸根
寄子百年心常恐樊籠中摧我鸞鶴襟誰知積雨後寒

芒曉森森恨我迫歸老不見汝十尋蒼皮護玉骨旦莫
視古今何人風雨夜卧聽饑龍吟

次韻錢穆父馬上寄蔣穎叔二首

玉關不用一丸泥自有長城烏鼠西剩與故人尋土物
臘糟紅麴寄馳蹄

多買黃封作洗泥使君來自隴山西高才得免人人羨
爭欲尋蹤覓舊蹄

表弟程德孺生日

仗下千官散紫庭時聞小語說蘇程長身自昔傳甥舅

壽骨遙知是弟兄

予與君皆壽骨貫耳班列中多指予二人不問而知其為中表也

曾

活萬人寧望報

君在楚州予在杭州皆遇飢歲活數萬人

祇求五畝却歸耕

四朝遺老凋零盡鶴髮他年幾箇迎

七年九月自廣陵召還復館于浴室東堂八年

六月乞會稽將去汶公乞詩乃復用前韻

乞郡三章字半斜廟堂傳笑眼昏花上人問我遲留意

待賜頭綱八餅茶

尚書學士得賜頭綱龍茶一斤八餅今年綱到最遲

夢遶吳山却月廊白梅盧橘覺猶香

杭州梵天寺有月廊數百間寺中多

白梅盧橘

會稽且作須臾意從此歸田策最良

東南此去幾時歸倦鳥孤雲豈有期斷送一生消底物
三年光景六篇詩

吳子野將出家贈以扇山枕屏

我我扇中山絕壁信天剖誰施大圓鏡衡霍入戶牖得
之老月師畫者一醉更常疑若人胸自有雲夢數千巖
在掌握用捨彈指久低昂不自知恨寄兒女手短屏雖

曲折高枕謝奔走出家非今日法水洗無垢浮游雲釋
嶠燕坐柳生肘忘懷紫翠間相與到白首

東府雨中別子由

庭下梧桐樹三年三見汝前年適汝陰見汝鳴秋雨去
年秋雨時我自廣陵歸今年中山去白首歸無期客去
莫歎息主人亦是客對床定悠悠夜雨空蕭瑟起折梧
桐枝贈汝千里行重來知健否莫忘此時情

謝仲適坐上送王敏仲北使

衝風振河朔飛霧失太行相逢不相識下馬須眉黃洗
眼忽驚笑見此玉節郎喜有賢主人共此燈燭光聚散
一夢中人北鴈南翔吾生如寄耳送老天一方幸子遇
明主陳經入西廂歸期不可緩倚相宜在傍

書丹元子所示李太白真

天人幾何同一漚謫仙非謫乃其游麾斥八極隘九州
化為兩鳥鳴相酬一鳴一止三千秋開元有道為少留
縻之不可矧肯求西望太白橫峨岷眼高四海空無人

大兒汾陽中令君小兒天台坐忘真生平不知高將軍
手汗吾足乃敢瞋作詩一笑君應聞

次韻曾仲錫承議食蜜漬生荔枝

代北寒蠶擣韭萍奇苞零落似晨星逢鹽久已成枯腊
得蜜猶應是薄刑欲就左慈求拄杖便隨李白跨滄溟
攀條與立新名字兒女稱呼恐不經

俗有十八
娘荔枝

大行太皇太后挽詞二首

至矣吾三后功高漢已還復推元祐冠蓋得永昭全

臣嘗

於經筵論奏仁宗皇帝謚曰明孝若明而不仁則民畏而不愛仁而不明則民愛而不畏今大行太皇太后亦兼此二德故天下思慕庶幾於仁宗也

有作猶非聖無私乃是天侍臣談

要道家法信家傳

宰相以下嘗於經筵論奏祖宗以來家法十餘事書於記注

却狄安諸夏先王社稷臣固應祠百世何止活千人定策天知我忘家帝念親萬方何以報得疾為勤民

再和曾仲錫荔支

柳花著水萬浮萍荔實周天兩歲星

柳至易成飛絮落水中經宿即為浮

萍荔支至難長二十四五年乃實

本自玉肌非鵠浴至今丹殼似猩刑

侍郎賦詠窮三峽妃子煙塵動四溟莫遣詩人說功過
且隨香草附騷經

次韻滕大夫三首

雪浪石

太行西來萬馬屯勢與岱嶽爭雄尊飛狐上黨天下脊
半掩落日先黃昏削成山東二百郡氣壓代北三家村
千峯右卷蠹牙帳崩崖鑿斷開土門謁來城下作飛石
一礮驚落天驕魂承平百年烽燧冷此物僵卧枯榆根

畫師爭摹雪浪勢，天工不見雷斧痕。
離堆四面繞江水，坐無蜀士誰與論。
老翁兒戲作飛雨，把酒坐看珠跳盆。
此身自幻孰非夢，故園山水聊心存。

同前

我頃三章乞越州，欲尋萬壑看交流。
且憑造物開山骨，已見天吳出浪頭。
石中似有海獸形狀履道鑿池雖可致，
玉川卷地若為收。洛陽泉石今誰主，
莫學癡人李與牛。

沈香石

壁立孤峯倚硯長，共疑沈水得頑蒼。
欲隨楚客紉蘭佩，誰信吳兒是木腸。
山下曾逢化松石，玉中還有辟邪香。
早知百和俱灰燼，未信人言弱勝強。

石芝詩 并引

予昔夢食石芝，作詩記之。今乃真得石芝於海上，子由
和前詩見寄，予頃在京師有鑿井得如小兒手以獻者，
臂指皆具膚理。若生子聞之，隱者曰：此肉芝也。與子由
烹而食之，追記其事，復次前韻。

土中一掌嬰兒新爪指良是肌骨勻見之怖走誰敢食
天賜我尔不及賓旌陽遠游同一許長史玉斧皆門戶
我家韋布三百年祇有陰功不知數跪陳八簋加六瑚
化人視之真塊蘇肉芝烹熟石芝老笑唾熊掌嘖雕胡
老蠶作蠶何時脫夢想至人空激烈古來大藥不可求
真契常如磁石鐵

鶴歎

園中有鶴馴可呼我欲呼之立坐隅鶴有難色側睨予

豈欲臆對如鵬乎我生如寄良畸孤三尺長脰閣瘦軀
俛啄少許便有餘何至以身為子娛驅之上堂立斯須
投以餅餌視若無嚙然長鳴乃下趨難進易退我不如
送曾仲錫通判如京師

邊城歲暮多風雪強壓春醪與君別玉帳夜談霜月苦
鐵騎曉出冰河裂斷蓬飛葉卷黃沙祇有千林鬢鬆花
應為王孫朝上國珠幢玉節與排衙左援公孝右孟博
我居其間嘯且諾僕夫為我催歸來要與北海春水爭

先回

和錢穆父送別并求頓遞酒

次韻

聯鑣接武兩長身
鷓鴣行中語笑親
九子羨君門戶壯
八州憐我往來頻
竹聞東府開賓閣
便乞西湖洗塞塵
更向青齊覓消息
要知從事是何人

東坡全集卷二十一